

TEKS UCAPAN TETAMU KEHORMAT

**DI MAJLIS PEMBUKAAN RASMI
THE INTERNATIONAL CONFERENCE ON TEACHERS EDUCATION 2019
(ICOTE 2019)
ANJURAN
FAKULTI PENDIDIKAN,
KOLEJ UNIVERSITI PERGURUAN UGAMA SERI BEGAWAN
1441 HIJRAH / 2019 MASIHI**

**YANG MULIA
PENGIRAN DATO SERI PADUKA HAJI BAHROM BIN PENGIRAN HAJI BAHAR
TIMBALAN MENTERI HAL EHWAL UGAMA
NEGARA BRUNEI DARUSSALAM**

**PADA
HARI ISNIN
14HB RABIULAWAL 1441H BERSAMAAN 11HB NOVEMBER 2019M**

**JAM
8.45 PAGI**

**BERTEMPAT
DEWAN TARBIYAH,
KOLEJ UNIVERSITI PERGURUAN UGAMA SERI BEGAWAN
NEGARA BRUNEI DARUSSALAM**

بِسْمِ اللَّهِ الرَّحْمَنِ الرَّحِيمِ
الْحَمْدُ لِلَّهِ رَبِّ الْعَالَمِينَ
وَالصَّلَاةُ وَالسَّلَامُ عَلَى أَشْرَفِ الْأَنْبِيَاءِ وَالْمُرْسَلِينَ وَعَلَى آلِهِ وَصَحْبِهِ أَجْمَعِينَ
السَّلَامُ عَلَيْكُمْ وَرَحْمَةُ اللَّهِ وَبَرَكَاتُهُ

Yang Mulia,
Prof. Madya Dr. Muhamad Zahiri bin Awang Mat,
Dekan Fakulti Pendidikan selaku Pengarah Program *ICOTE 2019*.

Yang Mulia,
Awang Haji Mohd Serudin bin Haji Timbang.
Timbalan Setiausaha Tetap (Dasar dan Keagamaan),
Kementerian Hal Ehwal Ugama.

Yang Mulia,
Dr. Haji Adanan bin Haji Basar
Ra'es Kolej Universiti Perguruan Ugama Seri Begawan

Yang Mulia,
Awang Saidai bin Haji Hitam,
Dekan Pelajar Universiti Brunei Darussalam

Yang Mulia
Dr. Abang Hadzmin bin Haji Abang Taha,
Timbalan Ra'es KUPU SB

Yang Berbahagia

Prof. Madya Dr. Shukree Langputeh,

Timbalan Rektor Perhubungan Antarabangsa dan Alumni,

Universiti Fatoni selaku Pembentang Utama

Yang Berbahagia

Prof. Dr. Rosnani Hashim

Pensyarah Universiti Islam Antarabangsa Malaysia

Selaku Pembentang Utama

Yang Mulia,

Pengarah-Pengarah, Pegawai-Pegawai Utama Kolej Universiti Perguruan

Ugama Seri Begawan, Pegawai-Pegawai Kanan Kerajaan, Para Jemputan,

Para Panel Pembentang Kertas Kerja Persidangan, Para Peserta serta para

hadirin dan hadirat yang dihormati sekalian.

Alhamdulillah, peramba/saya bersyukur ke hadrat Allah *Subhanahu Wata'ala* kerana dengan limpah kurnia, rahmat dan izinNya jua, kita dapat sama-sama hadir pada pagi ini dalam Majlis 'Persidangan Antarabangsa Pendidikan Guru 2019 (*The International Conference on Teachers Education in 2019*) dengan tema "***Falsafah Pendidikan Pemangkin Pembangunan Pendidikan Abad Ke-21***".

Peramba/saya sukacita mengambil kesempatan ini mengucapkan terima kasih kepada Pengerusi dan juga ahli-ahli Jawatankuasa Persidangan kerana berkesudian menjemput peramba/saya hadir selaku tetamu kehormat dan seterusnya mengucapkan tahniah dan syabas di atas penganjuran Persidangan yang bermanfaat ini.

Hadirin-hadirat yang peramba/saya hormati sekalian,

Persidangan Antarabangsa Pendidikan Guru 2019 (*The International Conference on Teachers Education in 2019*) ini adalah salah satu aktiviti ilmiah yang diungkayahkan oleh Fakulti Pendidikan, KUPU SB. Persidangan ini merupakan salah satu *platform* untuk mendukung dan memberigakan lagi kepentingan memahami falsafah pendidikan dan pelaksanaannya dalam era *Revolusi Industri 4.0* ini. Pemahaman tentang falsafah, visi dan misi dalam

konteks pendidikan dan perguruan menjadi penyumbang utama kepada pembangunan sesebuah negara. Ia juga dapat melestarikan ketamadunan keilmuan sesebuah negara dengan mengambil kira kepentingan aspek mental dan fizikal serta aspek rohani dan spiritual.

Sejarah telah membuktikan bahawa tokoh-tokoh ilmunan Islam seperti al-Ghazali, Ibn Sina, Ibn Khaldun, Ibn Jama'ah, Imam An-Nawawi dan lain-lain lagi telah membicarakan tentang epistemologi ilmu secara komprehensif sebagai panduan kepada pemikir pendidikan dan perguruan dalam merangka dan membina falsafah pendidikan dan program profesionalisma keguruan. Begitu juga tokoh-tokoh pendidikan Islam moden seperti Al-Toumi Al-Syaibani, Majid Arsan Al-Kailani, Syed Naquib Al-Attas dan lain-lain lagi telah memposisikan kepentingan falsafah pendidikan dan keguruan sesuai dengan perubahan arus moden.

Hadirin-hadirat yang peramba/saya hormati sekalian,

Alhamdulillah, Negara Brunei Darussalam sebagai Negara yang berdaulat dengan pegangan falsafah **Melayu Islam Beraja** untuk sekian lama, terus kukuh berdiri tegak dan istiqamah dalam memartabatkan pendidikan samada di peringkat Rendah, Menengah, Kolej dan Universiti Awam tempatan. Kerjasama erat antara Kementerian Pendidikan dan Kementerian

Hal Ehwal Ugama dalam bidang pendidikan ini yang sentiasa berusaha meningkatkan kaedah penyampaian ilmu, kemahiran dan syahsiah serta jati-diri pelajar supaya sentiasa relevan dengan arus perubahan dunia.

Wacana dan diskusi ilmiah berkaitan falsafah dan profesionalisma keguruan memainkan peranan penting dalam menyumbang dan membangunkan negara dan modal insan lebih-lebih lagi dalam sama-sama mendukung hasrat Sistem Pendidikan Negara Abad ke-21 (SPN21) dan ke arah mencapai Wawasan Negara 2035. Justeru, Persidangan ICOTE 2019 ini boleh menjadi wadah ke arah meningkatkan profesion keguruan dalam membentuk masyarakat dan pembangunan negara.

Kebawah Duli Yang Maha Mulia Paduka Seri Baginda Sultan Haji Hassanah Bolkiah Mu'izzaddin Waddaulah, Sultan Dan Yang Di-Pertuan Negara Brunei Darussalam pernah bertitah sempena Majlis Konvokesyen Ketujuh Kolej Universiti Perguruan Ugama Seri Begawan tahun 1439H/2017M, antara petikan titah tersebut:

"... Negara sangat memerlukan disiplin-disiplin yang bermanfaat untuk pembangunan modal insan. Adalah tidak memadai, kita belajar hanya untuk ilmu, tetapi ilmu mesti dipelajari untuk jadi pelengkap.

Setiap pusat pengajian tinggi hendaklah sentiasa menilai program yang ditawarkan, supaya kandungan kurikulumnya tetap relevan dan praktis dengan keperluan-keperluan semasa. Ini termasuklah kaedah pengajaran dan penilaian perkembangan pelajar.

Dalam konteks ini juga, pusat pengajian tinggi perlu untuk memastikan staf akademiknya memiliki ciri-ciri profesional yang tinggi, yang mampu menghidangkan pendekatan-pendekatan yang efektif dan inovatif serta dapat pula membuat penilaian perkembangan pelajar secara holistik dan saksama.

Beta mengambil maklum, bahawa KUPU SB telah menyediakan beberapa kompetensi dalam usaha melahirkan graduan pendidik yang berjati diri. KUPU SB juga sedang giat memantapkan program-program bagi mencapai kompetensi berkenaan.

Usaha ini sangatlah wajar dan bagus. Namun kaedah penilaian mestilah juga kemas dan sistematik, supaya para graduan benar-benar mencapai kualiti kompetensi yang diharapkan.

Pendeknya, semua pusat pengajian tinggi, perlu bergerak mengemaskan program dan kokurikulum masing-masing, supaya dapat melahirkan para graduan yang seimbang dan holistik dari aspek-aspek kerohanian, intelek, jasmani, keusahawanan dan kemasyarakatan." Demikian titah Baginda

Peramba/saya berharap menerusi objektif Persidangan kali ini sebagaimana dimaklumkan kepada peramba/saya iaitu bagi perkongsian pengalaman, peranan dan pelaksanaan falsafah pendidikan dalam sistem pendidikan, meninjau kepentingan falsafah pendidikan dan kurikulum dalam era *Revolusi Industri 4.0* dan meneroka peranan falsafah pendidikan Islam dalam pembentukan modal insan berdaya saing dalam kalangan tenaga akademik di peringkat sekolah, kolej dan universiti dalam dan luar negara akan dapat mengukuhkan lagi hasrat murni kurnia titah Kebawah Duli Yang Maha Mulia Paduka Seri Baginda Sultan dan Yang Di-Pertuan Negara Brunei Darussalam itu.

Hadirin-hadirat yang peramba/saya hormati sekalian,

Peramba/Saya yakin Persidangan ini akan dapat seterusnya memantapkan lagi pemahaman dan pelaksanaan epistemologi ilmu dalam kerangka pendidikan dan keguruan di samping membahaskan pendekatan dan pedagogi yang berkesan dalam pengajaran dan pembelajaran.

Dalam masa yang sama, penganjuran Persidangan ini juga diharap dapat mengenal-pasti isu-isu dan cabaran dalam menstrukturkan kurikulum dan pendidikan keguruan yang lebih komprehensif dan relevan dengan era Revolusi Industri 4.0 menerusi pembentangan hasil-hasil kajian ahli akademik dan penyelidik dari pelbagai negara.

Peramba/saya melihat usaha KUPU SB dalam menganjurkan Persidangan seperti ini adalah **sangat signifikan** terutama dalam menghadapi pelbagai kemajuan dan pembaharuan era digital pada masa ini. Kita semua telah mengetahui bahawa masyarakat telah memahami dan bercakap tentang *Internet of Things, Data Analytic, Massive Open Online Courses (MOOC), virtual university* dan lain-lain lagi.

Setentunya tidak dapat tidak dan kita akui mengenai kepentingan **integrasi teknologi** dalam dunia pendidikan, namun begitu komponen yang perlu dititik-beratkan dalam integrasi teknologi tersebut adalah bagaimana untuk kita memastikan dan mengadunkan **elemen-elemen nilai murni agama dan sejagat** akan dapat diterapkan dan dipupuk secara komprehensif dalam sistem pendidikan ke arah pembentukan insan holistik.

Justeru, peramba/saya menyeru kepada para pemikir, pengkaji dan ahli akademik agar dapat **melihat dan menilai** semula pernyataan 'Falsafah Pendidikan' agar lebih relevan dengan perkembangan terkini, begitu juga dalam memformulasi Falsafah Pendidikan Islam dalam acuan terkini.

Di samping itu, peranan yang perlu dimainkan oleh pihak berautoriti dalam menjayakan misi dan visi pendidikan yang berteraskan Falsafah Pendidikan yang jelas.

Para hadirin hadirat sekalian,

Keiltizaman Kerajaan Negara Brunei Darussalam dalam usaha memartabatkan pendidikan sangat terserlah khususnya melalui peningkatan kualiti pengajian dan pendidikan, kedaulatan perlembagaan dan perundangan undang-undang Islam serta kesungguhan institusi pengurusan dan pentadbiran pendidikan dan agama Islam dalam memberi faham ilmu serta menegakkan syiar Islam di seluruh negara.

Peramba/saya mengambil kesempatan menyeru sekalian yang hadir khususnya penganjur persidangan, KUPU SB dengan kerjasama pihak yang berkaitan agar sama-sama duduk dan bertukar fikiran dan idea dalam membentuk ke arah meningkatkan kualiti ilmu para pendidik di samping

memantapkan profesionalisma keguruan dari semasa ke semasa demi kelangsungan hidup bermasyarakat dan beragama di Negara Brunei Darussalam yang kita cintai ini menurut acuan Ahli Sunnah Wal-Jamaah dan mazhab Syafie. Semoga kita semua selaku rakyat Brunei akan terus teguh berpegang dengan prinsip falsafah Negara Melayu Islam Beraja dan menjadikan Negara Brunei Darussalam sebuah Negara Zikir.

Sebelum mengakhiri ucapan ini, peramba/saya sekali lagi mengucapkan ribuan terima kasih kepada pihak penganjur, para pemikir, pengkaji dan ahli akademik yang hadir pada pagi ini dan peramba/saya penuh berharap semoga dapatan dari Persidangan ini akan memberi manfaat kepada kita semua umumnya dan kepada negara dan masyarakat Brunei khususnya.

Akhirnya, dengan lafaz:

بِسْمِ اللَّهِ الرَّحْمَنِ الرَّحِيمِ

اللَّهُمَّ صَلِّ عَلَى سَيِّدِنَا مُحَمَّدٍ وَعَلَى آلِ سَيِّدِنَا مُحَمَّدٍ

Peramba/saya dengan sukacitanya merasmikan

Persidangan Antarabangsa Pendidikan Guru 2019

(The International Conference On Teachers Education in 2019),

Kolej Universiti Perguruan Ugama Seri Begawan.

Sekian.

وبالله التوفيق والهداية والسلام عليكم ورحمة الله وبركاته